

Grond smirvegl tar ils turistichers grischuns

Cun Jürg Schmid al timun da Grischun Vacanzas mo paucs che han quintà

DAD ANDREAS CADONAU

■ **Speculaziuns davart la futura u il futur president da Grischun Vacanzas ha ì da bleras. Cun il directur partent da Svizra Turissem Jürg Schmid dentant sulet paucs che han quintà. Las abilitads professionalas e comunicativas dal nov president che vegn elegi ils 14 da zercladur na vegnan betg dubitadas.** «Na, cun la proposta da *Jürg Schmid* n'hai jau insumma betg quintà.» *Sepp Caluori*, president da Gastro Grischun, è sta surstà sco bliers auters da la novitad ch'il directur da l'organisaziun tetgala dal turissem svizzer, Jürg Schmid, saja pront da surpigliar il presidi da Grischun Vacanzas. Speculaziuns davart la proposta da la suprastanza da Grischun Vacanzas per la successiun da *Marcel Friberg* è creschidas suenter che l'elecziun dal nov president è vegnida spustada a chaschun da la radunanza dals 2 da matg 2017. Schmid è bain stà preschent a quella radunanza sco directur da Svizra Turissem per explitgar als turistichers grischuns la strategia da l'organisaziun tetgala dal turissem svizzer. Ina organisaziun ch'el vegn a bandunar. Sulet singuls dals preschents a la radunanza dals 2 da matg han dentan savì che Schmid saja il motiv che Friberg ha annunzià ch'il nov timun, il grond nunenconuscent, vegnia elegi a chaschun dad ina radunanza extraordinaria ils 14 da zercladur 2017. La fasa da specular è terminada e Caluori è persuadi da las abilitads professionalas da Schmid ch'enconuschia la bransch turistica naziunala ed internaziunala sco paucs en Svizra. Sch'el enconuschia den-



Il nov president da Grischun Vacanzas Jürg Schmid en discurs cun il schef operativ Martin Vincenz.

FOTO Y. BÜRKL

tant las atgnadads grischunas saja ina autra dumonda. Quai sappia dentant er esser d'avantag. Il president da Gastro Grischun avess tuttina preferì in president oriund dal chantun Grischun, è dentant persuadi da pudair collavurar senza problems cun il nov president da Grischun Vacanzas.

S'integrar en la rait grischuna

Sumegliant sco Sepp Caluori è *Marcus Caduff*, president dal cussegl d'administraziun da Surselva Turissem, s'exprimì. Er el attribuescha a Schmid enconuschientschas fundadas dal turissem naziunal ed internaziunal. Caduff valitescha l'integraziun da Schmid en la rait grischuna per impurtanta e spera ch'il nov president possia reagar sin e resguardar las sensibilidades grischunas. L'egliada e derivanza d'ordvart sappia esser tant d'avantag sco dischavantag. Il nov president na vegnia dentant almain a l'entschatta betg suspectà da resguardar interess particulars. E tgai ha motivà Schmid dad annunziar sia prontad da surpigliar il presidi da Grischun Vacanzas. L'ambient per il turissem muntagnard n'è betg il meglier. Il directur partent da Svizra Turissem ha ditg dad avair lavurà antruras en la bransch da la comunicaziun electronica ch'enconuschia in cuntinuau progress. El saja bain persuadi ch'il turissem svizzer e grischun n'haja betg pudì profitar da l'augment dal turissem global. «Nus na possedain nagina clavella da struvegiar vi da la valur u vi dal clima.» Schmid ha explitgà dad esser in turisticher cun gronda passiuin. Ed el è persuadi da la valur economica dal turis-

sem per il Grischun e che quel turissem stoppia prosperar. Il Grischun giaschia ad el a cor, in chantun ch'el enconuschia sco giast da vacanzas. Ed in chantun ch'el attribuescha dad avair in grond potenzial per pledentar ils basegns da vacanzas e da recreaziun da l'uman modern. El vesa nagliur ina tala gronda varietad culturala sin in spazi uschè pign sco en il Grischun. «La trilinguitad dal chantun Grischun è ina da quellas fermezzas.» Fermezzas autenticas ch'en ozendi dumanadas. Sia derivanza d'ordvart dal chantun Grischun valitescha Schmid per avantag uschia ch'el sappia s'engaschar senza pregiudizis. Il directur partent da Svizra Turissem sa legra sin ses engaschi a favur dal turissem grischun.

Il favorit da la suprastanza

Sa legrar po era l'actual president da Grischun Vacanzas Marcel Friberg. Era sche la comunicaziun dal successur n'è betg succedida tenor plan. «Ussa na stoss jau dentant betg guntgir cuntinuidamain a las dumondas suenter mia successiun.» Friberg ha ditg che Schmid saja il candidat favorisà da la suprastanza da Grischun Vacanzas. Entaifer quel gremi hajan ins fatg ina glista cun nums da potenzials presidents e presidentas da Grischun Vacanzas. Tranter quels sa chattavia er il num da Schmid. In um, tenor Friberg, cun las abilitads ed ils contacts necessaris per ademplir l'incumbensa. Ed el ha accentuà che Schmid possedia la flexibilitad professionala necessaria per exequir l'incumbensa dal president da Grischun Vacanzas.